

皇
明
疏
鈔

皇明疏鈔卷之四十六

禮儀二

正典禮第一疏

張孚敬

臣切謂孝子之至莫大乎尊親尊親之至莫大乎以天下養伏惟皇上應天順人嗣登大寶廼即勅議追尊興獻王以正其號奉迎聖母以致其養此誠孝子之心有不能自己者也茲者朝議謂皇上入嗣大宗宜稱孝宗皇帝為皇考改稱興獻王為皇叔父興獻大王興獻王妃為皇叔母興獻大王妃者然不過拘執漢定陶王宋濮王故事謂為人後者為之子不得復顧其私親之說耳伏承聖

諭以此禮事體重大令博求典故務合至當之論臣
有以仰見 皇上純孝之心矣比有言者遂謂朝議
為當恐未免膠柱鼓瑟而不適於時黨同伐異而不
當於理臣固未敢以為然也夫天下豈有無父母之
國哉臣則立 清朝發憤痛心不得不為 皇上明
辯其事記曰禮非從天降也非從地出也人情而已
矣故聖人緣人情以制禮所以定親疎決嫌疑別異
同明是非也夫漢之哀帝宋之英宗乃定陶王濮王
之子當時成帝仁宗無子皆預立為皇嗣而養之於
宮中是尚為人後者也故師丹司馬光之論施於彼
一時猶可今 武宗皇帝已嗣 孝宗祚有七年比

於崩殂而廷臣遵 祖訓奉 遺詔迎取 皇上入

繼 大統豈非以天下者 祖宗之天下天下之天

下也 臣伏讀 祖訓曰凡朝廷無皇子必兄終弟及

夫 孝宗 興獻王兄也 興獻王 孝宗親弟也

皇上 興獻王長子也今 武宗無嗣以次屬及則

皇上之有天下直猶 高皇帝親相授受者也故

遺詔直曰興獻王長子倫序當立初未嘗明著為

孝宗後比之預立為嗣養之宮中者其公私實較然

不同矣或以 孝宗德澤在人不可無後夫 孝宗

誠不可忘也假使 興獻王尚存嗣位今日恐弟亦

無後兄之義夫 興獻王往矣稱之以皇叔父鬼神

固不能無疑也。今聖母之迎也，稱皇叔母，則當以君臣禮見。恐子無臣母之義，禮長子不得為人後，况興獻王惟生，皇上一人利天下而為人後，恐子無自絕父母之義。故在皇上謂繼統，武宗而統尊崇其親，則可謂嗣。孝宗以自絕其親，則不可。或以大統不可絕為說者，則將繼孝宗乎？繼武宗乎？夫統與嗣不同，而非必父死子立也。漢文帝承惠帝之後，則以弟繼；宣帝承昭帝之後，則以兄孫繼。若必強奪此父子之親，建彼父子之號，然後謂之繼統，則古嘗有稱高伯祖、皇伯考者，皆不得謂之統矣。或以魏詔謂由諸侯入奉大統，則當明為人後之義，殊不

知曹叡是時尚未有嗣其詔蓋預為外藩援立者坊
此有為之私非經常之典也可槩論乎故曰禮時為
大順次之不時不順則非人情矣非人情則非禮矣
臣竊敢謂今日之禮宜別為 興獻王立廟 京師
使得隆尊親之孝且使母以子貴尊與父同則 興
獻王不失其為父 聖母不失其為母矣夫人必各
本父母而無二議禮者亦惟體之於心而已今者不
稽古禮之大經而泥末世之故事不守 祖宗之明
訓而率曹魏之舊章此臣之所未解者也雖然非天
子不議禮今 皇上虛已宏大疇咨衆言倘以朝議
為禮之當稱號一定不可復易且將使天下後世之

人皆知以利為利而自遺其父母疑非永言孝思孝
思維則之謂也臣竊惟此禮乃天經地義萬代瞻仰
毫釐之差千里之謬故大臣平章小臣獻納皆分之
宜也書曰有言逆于女心必求諸道有言遜于女志
必求諸非道夫逆心之言疑于忠而未必皆道也遜
志之言疑於諛而未必皆非道也臣愚豈敢導諛君
上以自誤於不忠又豈敢昧於自獻以誤君於不孝
惟 聖明體察而裁決焉臣不勝懇切聽 命之至

正典禮第二疏

張孚敬

臣叨逢 聖明議當代典禮為萬世法程廷臣乃固
執漢定陶王宋濮王故事以致 皇上恩紀不明而

父子大倫廢矣夫帝王中天地而立為三綱五常之主而廢大倫豈小故哉臣不得已乃據禮書別異同明是非上塵 聖覽然此非臣一人之見凡有識者所共知也間有一二臺諫不能開陳又從附和交章擊臣目為諂諛詆為希進由是有識之士雖有章奏已具皆鉗口畏禍無復敢獻遂使萬世公議阻於上聞祇見臣說孤立似一人之私也夫禮以非禮為非而非禮亦以禮為非此臣所以不能自已於言也唐陸贄曰上不負天子下不負所學臣愚雖未之學也其不敢負天子之心天地鬼神實臨之也伏惟皇上聰明仁孝理無不燭必將從衆議乎則衆議未

見其可將違衆議乎而謙抑之心未必肯遽違者也
 臣切謂非天子不議禮願 皇上奮然裁斷揭父子
 大倫明告中外以皇叔父母不正之名決不可稱則
 大倫正而大禮定矣誠又慮夫 皇上大孝之心鬱
 鬱不明於天下後世臣之罪也謹錄與或人問答之
 詞以 聞或問今之典禮議者必以我 皇上宜考
 孝宗而以 興獻王為叔父謂之崇大統也割私恩
 也漢宋之故事也舉朝無明莫非子獨以為言者何
 也 臣答曰此乎敬甚不得已者也蓋禮之大者變者
 也議之失得萬代瞻仰也此乎敬甚不得已者也子
 不求諸漢宋之故事乎成帝無子立定陶共王之子

為嗣仁宗無子立濮安懿王之子為嗣則哀帝英宗者乃是預立素養明為人後者也故當時師丹司馬光之論於事較合於義似近矣今孝宗皇帝既嘗以祖宗大業授之武宗但知武宗為之子也武宗嗣位又十有七年未有儲建是武宗無嗣孝宗未嘗無嗣也且孝宗賓天之日我皇上猶未之誕生也是孝宗固未嘗以後託也武宗賓天之日我皇上在潛邸也是武宗又未嘗託為誰後也其與漢宋之故事大不相類者矣今者必欲我皇上為孝宗之嗣承孝宗之統則孰為武宗之嗣孰承武宗之統乎竊原孝宗既以大

三
二
三
五

周
紀
十

業授之 武宗矣其心豈肯舍已之子而子兄弟之
子以絕其統乎 武宗既以大業受之 孝宗矣其
心豈肯舍已父而不之繼而委叔兄弟繼之以自絕
其統乎茲議也 二宗在天之靈果足慰乎夫父子
之恩天性也不可絕者也知 孝宗與 武宗之心
則知 興獻王與我 皇上之心矣問者曰然則我
皇上於大統也將誰繼乎臣答曰繼 武宗之後以
承 祖宗者也蓋嘗三復迎立之詔矣曰 興獻王
長子倫序當立迎取來京嗣 皇帝位議之公也又
嘗三復勸進之箋矣曰以 憲宗皇帝之孫繼 孝
宗皇帝之統說之變也由前之言則我 皇上所繼

者 武宗也是 武宗雖無嗣而有統矣由後之言
則我 皇上所繼者 孝宗也是 武宗雖有統而
無傳矣問者曰統與嗣有不同乎臣答曰不同也夫
統乃帝王相傳之次而嗣必父子一體之親也謂之
統則倫序可以時定謂之嗣則天恩不可以強為矣
今之議者不明統嗣二字之義而必以為嗣謂之繼
統且曰帝王正統自三代以來父子相承厥有常序
曾有自三代以來之正統必一於父子相承者哉盖
得其常則為父子不得其常則有為兄弟為伯叔姪
者也此統所以與嗣有不同問者曰議者謂 武宗
以大業授我 皇上有父道焉故 皇上執喪盡禮

無非盡子道也但昭穆之同不可為世故止稱皇

兄又謂我皇上既兄武宗自宜父孝宗茲言

何謂也臣答曰父子之恩天性也不可絕也不可強

為也方武宗賓天群臣定議以迎我皇上也遵

祖訓也兄終弟及之文也何也孝宗兄也興獻

王弟也獻王在則獻王天子矣有獻王斯有

我皇上矣此所謂倫序當立推之不可避之不可

者也果若人言則皇上於武宗兄弟也固謂之

父子也於孝宗伯姪也亦謂之父子也於興獻

王父子也反不謂之父子可乎問者曰我皇上嗣

興獻王藩王也今嗣大統天子也恩亦極矣不正

父子之名得乎臣答曰天下外物也父子大倫也瞽
瞍殺人舜竊負而逃知有父而不知有天下也而况
今天下者祖宗之天下天下之天下也孝宗於
我皇上固不得以私相授受者也今欲我皇上
舍天性之父子而反稱伯姪為父子謂之崇大統也
割私恩也漢宋之故事也是天下重而大倫輕也而
可乎問者曰如子之言則孝宗不果於無後乎臣
答之曰孝宗有武宗為之子孝宗未嘗無後
也臣子於君父一也今者不念無嗣之武宗而重
念有嗣之孝宗者何歟茲果孝宗之無後乎抑
武宗之無後乎雖然自古帝王之無後者豈惟我

武宗然哉而其相傳之統則固未嘗絕也漢惠帝無嗣而文帝繼之未聞漢之統絕也唐中宗無嗣而睿宗繼之未聞唐之統絕也是謂兄終弟及也非必父死子立之謂也今孝宗之統傳之武宗武宗之統傳之皇上一統相承萬世無窮者也又何必強置父子之名而後謂之繼統也哉問者又曰子必以我皇上不當考孝宗豈以興獻王不可無後也議者以我皇上考孝宗而又以益王子崇仁王考興獻王是或一道乎臣答曰父子之恩天性也不可絕也不可強為也以我皇上考孝宗而又以崇仁王考興獻王是強為父子也使

孝宗不得子 武宗又使 興獻王不得子 皇上
是絕人父子也夫古之為禮者將使無後之人有後
今之為禮者將使有後之人無後矣而可乎問者曰
然則我 皇上於 孝宗也 武宗也其享祀也如
之何臣答曰自古帝王之繼統者得其常則為父子
不得其常則有為兄弟為伯叔姪者也但主其喪而
已主其祀事而已不必一於父子之稱也唐玄宗於
中宗也其祝詞則曰皇伯考也德宗於中宗也其祝
詞則曰高伯祖也不必一於父子之稱也曰然則我
皇上於 孝宗也何稱乎曰皇伯考其正也於 武
宗也何稱乎曰皇兄其正也於享祀 興獻王也則

曰皇考其正也如此則我皇上於父子也伯姪也兄弟也皆名正而言順矣問者曰禮長子不得為人後則我皇上將不可入繼大統乎臣答曰禮長子不得為人後是謂皇上不可以繼嗣也非謂不可入繼大統也程子曰禮長子不得為人後若無兄弟又繼祖之宗絕亦當繼祖此固嘗以義起而泛論之也今皇上為興獻王長子遵祖訓兄終弟及屬以倫序實為繼統非為繼嗣也設皇上若有兄弟亦自當入繼大統有不得而為遜避者矣問者曰魏明帝之詔議者轉以今衆者也子獨以為不足徵者何也臣答曰此魏太和三年之詔也按詔曰

皇后無嗣擇建支子以繼大統則當纂正統而奉公義何得復顧其私親哉又曰後嗣萬一有由諸侯入奉大統則當明為人後之義蓋是時皇后無嗣明帝以外藩援立故預為此詔以坊之至太和五年始立齊王芳為太子厥後高貴常道援立皆不外尊可見也故乎敬曰有為之私非經常之典也問者曰子欲為興獻王別立廟于京師亦有說乎不干於正統乎臣答曰立廟京師取古遷國載主之義也夫長子不得以離其父者也今夫士大夫之仕於他方也若長子雖有庶子亦載主而行也謂別立廟則固無干於正統者也問者又曰如子之言而論者乃懼以魯

桓僖宮之災且謂有朱熹兩廟爭較之嫌魯僖躋閔之失者何也臣答曰孔子在陳聞魯廟火曰其桓僖乎以為桓僖親盡無大功德而魯廟不毀故天災之也宋群臣請桃僖祖而正太祖東向之位故朱子謂使兩廟威靈相與爭較魯閔公無子庶兄僖公代立其子文公遂躋僖公於閔上故春秋譏其逆祀令別為興獻王立廟所以祭禰也非毀廟不當復立也何天災之足懼乎謂別立廟則固未嘗升興獻王主於太廟也何兩廟爭較之嫌魯僖躋閔之失乎不其謬哉問者曰然則在藩之墓如之何臣答曰墓與廟不同也嘗聞易墓非古也夫墓所以藏其體魄

而廟所以奉其神靈者也故墓可以代守而廟不可以代祀者也立廟京師崇四時之祭順孝子之心也問者曰舜受堯禪而不尊瞽瞍禹受舜禪而不尊鯀然則興獻王追尊之禮宜如之何臣答曰追尊非古也自文武以來未之有改也舜不尊瞽瞍不知以堯為父乎瞽瞍為父乎禹不尊鯀不知以舜為父乎鯀為父乎夫以今日之急務正名也名正則言順事成而禮樂興矣是在我皇上之心而已夫士階一命無不歆尊其親者也今尊崇之禮未定覃恩之典未舉然其授官之與未授者固已有先後得失之心矣是非亟其歆也孝子之誠也何獨至於我皇上

而疑之而使君之尊親不如已之尊親也是愛君不
如愛已也問者曰或以興獻王妃不可奉迎者何
也臣答曰此膠崇仁王為後之說者也以崇仁
王嗣興獻王則不可奉迎也夫有天下而不得養
其母豈人情哉今迎之而至天子之母也為天子
之母襲王妃之號則朝廷之相臨宮闈之相接皆
當謹守臣妾之禮矣已為天子母為臣妾竊恐我
皇上之心有不能一日自安者矣問者曰議者以漢
宣帝中興不尊史皇孫而嗣昭帝光武克復不尊南
頓君而嗣元帝以為可法者何也臣答曰此不知正
踵其非者也乎敬嘗按其故昭帝亡矣又立昌邑王

廢矣宣帝姑以兄孫入繼當時惟言嗣昭帝後而已
固未嘗知其為子乎為孫乎必也升一等而考昭帝
則又將降一等而兄史皇孫矣不可乎當時有司
奏固執為人後者為之子不得復顧其私親之說故
未有所處姑緣其所生父稱之曰皇考而已固未嘗
以昭帝為父而以史皇孫為兄也光武乃長沙定王
之後景帝七世之孫上嗣元帝夫元帝有成帝為之
子有哀帝平帝為之孫凡三傳矣又孺子嬰立凡四
傳矣時王莽篡立漢祚既滅而光武乃崛起者猶嗣
元帝可不可乎當時張純朱浮奏亦固執為人後者
為之子不得復顧其私親之說故別為南頓君立廟

稱皇考而已固亦未嘗以元帝為父而以南頓君為
叔也夫以宣帝嗣昭帝世數未間謂之統則可光武
嗣元帝世數已間既不可謂之嗣又不可謂之統矣
要之皆統嗣二字之義不能明辯故其弊必至於此
耳然則使二帝寡恩而不得盡尊崇之禮者正以俗
儒之說誤之也是尚可為法也哉問者又曰如子之
言則歷代之故事不足徵乎臣答曰以經議禮猶以
律斷獄則凡歷代故事乃其積年之判案耳苟不別
其異同明其是非槩欲以故事議禮而廢經猶以判
案斷獄而廢律也是又何足與議也問者曰為人後
者為之子不得復顧其私親其說如之何臣答曰此

非聖人之言漢儒之說也禮喪服記止云為人後者
為其父母報至開元開寶禮始云為人後者為其所
生父齊衰不杖朞為所後父斬衰三年雖所生所後
皆稱父母然未有改稱伯叔之文也宋濮議方有稱
皇伯之說而又加以程子之議故人皆宗之但朱子
猶有未安之論亦可見也夫常人之於伯叔也其愛
敬之心固未嘗不在者也今日為人後者為之子不
得復顧其私親是以父母為伯叔不復有愛敬之心
如路人矣故曰非聖人之言漢儒之說也况我皇
上乃入繼大統非為人後者也其說又焉可用哉問
者曰或以子之說嫌於迎會當聞於人而不當聞於

上也如之何臣答曰乎敬於人未嘗不聞也聞之以說為邪故不必聞也昔司馬光嘗謂朝廷闕政但於人主前極口論列未嘗與士大夫閒談以為無益也故聞於上也苟嫌於迎合也則必匡救其惡然後為忠而將順其美者皆不得為忠矣問者曰子之言備矣人以為邪說也柰何臣答曰不求人知而求天知也不求同俗而求同理也孔子曰事君盡禮人以為諂也吾夫子大聖人猶所不免乎敬小子何能敢避此不避之名也邪問者曰子以至寡之力而欲抗在朝之議恐三人占當從二人之言如之何臣答曰臣子之事君也知無不言言無不盡言盡其心而已

使乎敬之言是雖不用猶是也使乎敬之言非雖用之猶非也夫事固難明於一時而有待於後世者也今士大夫達於禮義者固已渙然而釋其疑有不待於後世者矣問者曰犯衆議也子於利害也不計也夫臣答曰乎敬不敢為終身謀也夫禮小失則入於夷狄大失則入於禽獸乎敬懼夫禮之失也故不敢為終身謀也

正典禮第五疏

張乎敬

臣等聞宋蘇軾曰有一言而興邦者不以為少有三日言而不輟者不以為多竊謂今日典禮名實秩然宜無容一言者然與朝議抗之三四載辯之六七疏

又不啻三日言而不輟者也人之言曰在朝之議多
非真多也附和之而多也臣等之議寡非真寡也不
敢言而寡也 皇上聖明豈不察之茲 詔令雖云
再下而典禮益甚乖違謹復條七事其大略不出前
言而提綱或便 聖覽 一曰 高皇帝獨取兄終
弟及為訓者蓋父子相傳為常有不必訓兄弟相傳
不常有故為之訓也夫 獻皇帝實 孝宗親弟雖
未嘗有天下以傳 皇上而 皇上之有天下實以
獻皇帝之子也 高皇帝雖未嘗以天下授 皇上
皇上之有天下實以 高皇帝之訓也擅擁立功者
欺天甚矣 二曰宋英宗初名宗實為濮王允讓第

十三子時方四歲仁宗取入宮中命曹后撫鞠之二十八年命學士王珪草詔立為皇子蓋濮王親嘗命之為仁宗子也仁宗親嘗命之為子也今獻皇帝未嘗命皇上為孝宗子也孝宗又未嘗命皇上為之子也况獻皇帝止生皇上一人為嫡長子又非若英宗之多兄弟可比而同之乎三曰宋真宗咸平元年三月詔議太祖廟號太祖稱伯張齊賢等上議云天子絕其喪安得宗廟中有伯氏之稱詔禮官別加詳定禮官仍議稱太祖室曰皇伯考妣又云唐玄宗廟禘祫云布昭穆之坐于戶外皇伯考中宗皇考睿宗並列于南廂北向同例穆位又郊

祀錄德宗廟祝文以中宗為高伯祖又云唐玄宗謂中宗為皇伯考德宗謂中宗為高伯祖則伯氏之稱復何不可奏可今 孝宗稱皇伯考名斯正矣 四曰本生父母對所後父母而言禮於所後者服三年名曰重於本生父母服降為期同於伯叔父名曰輕今 皇上尊稱 獻皇帝為皇考 章聖皇太后為聖母是明為父母所當重矣若仍係本生二字則又同於叔父叔母所當輕矣 五曰孟軻氏曰天之生物使之一本稱兩 皇考是二本也曾有兩考之禮乎夫三尺之童強以兩考之稱必赧然不從敢加之萬乘之尊乎今試坐 孝宗皇帝於此又坐 獻皇

帝於此 皇上趨於其前其何以稱諸以是揣諸

宗祝竊恐 二帝在天之靈不享也 六曰禮慈母

如母謂妾之無子者妾子之無母者父命妾曰女以
為子命子曰女以為母貴父之命也由是推之母子
之稱夫豈可苟乎今 昭聖有 武宗為之子復以

皇上為子 章聖止生 皇上而不得為之子為茲

議者果為全 兩宮之好乎啓 兩宮之嫌乎誠母

為母伯母為伯母以母事母事伯母猶母大孝無間

言矣 七曰喪小記云王者禘其祖之所自出以其

祖配之而立四廟庶子王亦如之陸氏謂若漢光武

有天下既立七廟則其曾祖禰當別立廟祀之故曰

庶子王亦如之臣推漢有司有議之者正緣謬以光武當考元帝而不當考南頓君故耳今之議者亦緣謬以皇上當考孝宗而不當考獻皇帝故謂不應為獻皇帝立廟夫始之以不學無術終之以相助匿非不亦異乎

正典禮第七疏

張孚敬

臣等切謂今日典禮之議與禮官屢疏折辯明白伏候勅旨召對猶恐無徵弗信謹將證據古典并愚情未盡之條列于後伏乞聖明留神垂察一古者天子無為人後之禮臣等謹按三代以前天子無嗣者皆兄終弟及無立後之禮防奸臣利於立幼非社

稷之福故商書凡兄弟相及者不稱嗣子而稱及王
至漢成帝立定陶共王子為嗣宋仁宗又立濮安懿
王子為嗣大儒朱熹有曰古禮之壞自定陶王時已
壞了蓋成帝不立弟中山王以為禮兄弟不得相入
廟乃立定陶王蓋子行也孔光以尚書盤庚之及王
爭之不獲當時濮廟之爭都是不曾好好讀古禮見
得古人意思觀此知古者天子無為人後之禮今議
禮之臣畔古禮書強執 皇上為 孝宗皇帝後此
欺妄一也 一 祖訓天子無為人後者臣等伏觀
祖訓凡朝廷無皇子必兄終弟及須立嫡母所生者
曰必兄終弟及則不立後可知曰須立嫡母所生者

則倫序可知蓋兄終弟及國有長君社稷之福立嫡
母所生如嫡長無嗣則立次嫡弟之嫡長不可奪者
太祖高皇帝真稽古三代之禮以垂萬世之法者也
今禮官必強執 皇上為 孝宗皇帝後不惟畔古
禮書雖 高皇帝訓亦不之遵此欺妄二也 一與
為人後者孔門所鄙臣等謹按天子諸侯無為人後
禮自古為然末世諸侯之大夫以下始有與為人後
者昔孔子射於矍相之圃使子路延射者曰賁軍之
將亡國之大夫與為人後者不入此可見為人後者
孔門之徒所深鄙之今議禮者不以 皇上為人繼
大統之君而忍比 皇上與為人後之例如閭閻中

乞養過房子一般是何說哉况古禮族人以支子後
大宗實大夫士之禮未聞以臣下敢執天子為人
後者此欺妄三也 一 皇上入繼大統之君臣等
伏讀 武宗皇帝遺詔云朕 皇考親弟 興獻王
長子聰明仁孝倫序當立迎取來京嗣皇帝位謂之
嗣皇帝位是繼 武宗皇帝之統初無為 孝宗皇
帝之子之說至 皇上登極之日始變其說以 皇
上為 孝宗之子繼 孝宗之統使 皇上違 武
宗皇帝之詔背 獻皇帝之恩遂至父子君臣皆失
其道此欺妄四也 一 禮官以 皇上稱 孝宗皇
帝為皇考 慈壽皇太后為聖母稱 恭穆獻皇帝

章聖皇太后為本生父母臣等謹按儀禮喪禮篇云

為人後者傳曰何以三年也受重也必以尊服服之

又曰為人後為其父母報傳曰何也不貳斬也夫於

所後父母服三年名曰重於本生父母服期年同於

伯叔父母名曰輕今孝宗皇帝本皇上之伯

慈壽皇太后本皇上之伯母反稱之曰皇考曰聖

母而為重焉獻皇帝本皇上之父章聖皇太

后本皇上之母而反稱之曰本生皇考本生母而

為輕焉輕者反重重者反輕議禮之臣亦各有父母

者試以其身處之於心安乎此欺妄五也

上止宜稱皇考恭穆獻皇帝聖母章聖皇太后

亟去本生二字改稱 皇伯考孝宗皇帝 皇伯考
慈壽皇太后臣等謹按唐玄宗稱中宗為皇伯考宗
真宗稱太祖室曰皇伯考妣及伏讀 祖訓凡親王
若天子之姪則稱天子曰伯父皇帝陛下叔父皇帝
陛下生可稱伯父死獨不可稱伯考乎今 皇上以
倫序入繼 大統於 孝宗皇帝宜生稱伯父死稱
伯考今禮官以廟中無伯考之稱棄禮書背 祖訓
此欺妄六也 一 皇上宜別為獻皇帝立廟京師
臣等謹按漢宣帝別為父史皇孫立皇考廟漢光武
別為父南頓君立皇考廟禮也又按漢哀帝追尊定
陶共王為共皇帝立寢廟京師蓋成帝曾立哀帝為

子故師丹以為不可者以共王為本生父故也今禮
官強執 皇上為 孝宗皇帝子比之定陶王為成
帝子以 獻皇帝為本生父故來邪說紛拏此欺妄
七也 一禮官又以 今日事體比之宋濮安懿王
臣等謹按濮王允讓第十三子初名宗實仁宗未有
嗣取宗實入宮命曹皇后撫鞠之年方四歲親命學
士王珪草詔立為皇子養之宮中二十八年與 皇
上不同况仁宗立濮王子為嗣大儒朱熹已曾并定
陶王事論其壞禮今禮官務牽合強比此欺妄八也
一 皇上宜迎 獻皇帝神主至京別立 新廟臣
等謹按禮記曾子問篇古遷國載群廟之主以從禮

也今禮官以為史籍並無遷主之事此欺妄九也

一 皇上入繼大統導 高皇帝祖訓不當輒稱

慈壽皇太后懿旨臣等伏覩 祖訓凡皇后只許內

治宮中諸等婦女人宮門外一應事務毋得干預况

立君繼統實導 太祖高皇帝兄終弟及之訓 慈

壽皇太后固不得專制干預者也今禮官輒陷 慈

壽皇太后違 祖訓以干預外事此欺妄十也 一

壽安皇太后不得終三年喪臣等謹按禮經嫡孫承

重者為祖父母服三年壽安皇太后止生 獻皇帝

又止生 皇上今 獻皇帝賓天 皇上實承重嫡

孫當率天下為三年喪禮也禮官乃定為哭臨一日

皇明疏鈔

卷之四十六

十九

夏商賈刊

喪服十三日旦以次多子之內不而

三年喪應二十七日期年應十二日然則十三日之說果何制也 壽安既為皇太后矣為 天子祖母矣當 詔天下喪之禮也以文移而不以詔及兩京而不及天下又何制也夫尊 皇上必當尊 獻皇帝尊 獻皇帝必當尊 壽安皇太后此等已往之事莫大之失為天下后世所訾 皇上雖欲追悔而不及者前日既誤今日可容再誤耶議禮者皆安然而無警悟此欺妄十一也 一再頒 詔令仍宜更改 臣等謹按記曰生曰父曰母死曰考曰妣蓋人之生必各稟於父母而無二豈有兩考之稱乎雖閭閻

童子亦羞稱之可加之 萬乘之尊乎主稱兩考不
知傍注奉祀果何稱子近者傳聞 皇上於 孝宗
皇帝稱嗣子於 恭穆獻皇帝稱長子夫於 恭穆
獻皇帝既稱長子於 孝宗皇帝可更稱嗣子乎長
子嗣子之別為二主傍注之稱自古經傳所未載也
今 皇上改 詔在一言之決不改則萬古之議此
欺妄十二也 一今日議禮朋比之故 臣等據禮決
然以 皇上入繼大統之君不應為 孝宗皇帝之
子妄議者決然以 皇上為 孝宗皇帝之子非入
繼大統之君兩論相持三年不決夫為 孝宗皇帝
之子說者其始變於奸權大臣一人而已禮官附之

九卿科道附之初不顧事體之大禮義之非者也臣等仰惟皇上聖明其純孝之心如此何忍負之是以奮不顧身與之辯明其兩京大小官員知朝議之非者十有六七阿附不知者止二三耳但知其非者少有私議輒目為奸邪風言謫降并考察黜退不知禮者憑為舉人恩主攘臂交攻不容人語又如九卿六科十三道官連名之疏豈議論同哉如九卿之首自草一疏不令衆見止以空紙列書九卿官銜令吏人送與書一知字有不書者即令所私科道官指事劾之雖大臣多嚙冤而去無敢聲言至於科道官連章則亦猶然者掌事一人執筆餘者聽從勢有所迫

故也今在 廷助臣議者不為不多瞻前顧後但領首稱是默然喟然而已夫古者三公論道九卿分職臺諫明目達聰今獨無愧於心乎此欺妄十三也

廟議第一疏

張孚敬

臣伏惟 皇上以大孝之心議尊親之典初因廷臣執論聚訟四年更 詔三遍蓋自漢宋以來之君所不決之疑至 皇上決之所未成之禮至 皇上成之真可謂洗千古之陋垂百王之法者也是以 新詔傳宣愚氓不應蓋禮必如此然後合乎天理之正即乎人心之安也茲光祿寺署丞何淵妄肆浮言破壞成禮稱 獻皇帝為所自出之帝請立世室列祀

太廟此何言也 臣與廷臣抗論之初即曰當別為
興獻王立廟京師又曰別立禩廟不干正統此非臣
一人之議天下萬世之公議也今何淵以 獻皇帝
為所自出之帝比之今之 德祖請立世室比之周
文王武王不經甚矣 皇上聰明中正諒已察之茲
言也上干 九廟之威監下駭四海之人心臣不敢
不為 皇上言之昔漢哀帝追尊父定陶共王為共
皇帝立寢廟京師序昭穆儀如孝元帝是為干紀亂
統人到如今非之今何淵請入 獻皇帝主於太
廟不知序於 武宗皇帝之上與序於 武宗皇帝
之下與 孝宗之統傳之 武宗序 獻皇帝於

武宗之上是為千統無疑 武宗之下又於繼統無
謂何淵所 請此何言也如謂 太廟中不可無禰
漢宣帝嗣昭帝後昭為宣之叔祖史皇孫嘗別立廟
未聞有議漢宗廟無禰者蓋名必當實不可強為也
如謂 獻皇帝廟終當何承臣謂由 皇上以及
聖子神孫於 太廟當奉以正統之禮於 獻皇帝
廟當奉以私親之禮尊尊親親並行不背者也先儒
謂孝子之心無窮分則有限得為而不為與不得為
而為之均為不孝 皇上追尊 獻皇帝別立廟者
禮之得為者也此臣所以昧死勸 皇上為之也入
獻皇帝主於 太廟者禮之不得為者也此臣所以

昧死勸 皇上不為之也夫成禮則難壞禮則易伏
乞 皇上念此禮大成原出 聖裁匪由人奪何忍
一旦遽為小人所破壞邪

廟議第二疏

張孚敬

近該署丞何淵稱 恭穆獻皇帝為所自出之帝請
立世室入祀 太廟 臣等據禮反覆明其不可節奉
聖旨待會議來朝廷自能審處 臣等知 皇上雖孝
心無窮而禮之大閑不肯踰矣續該禮部會議 上
聞奉 聖旨你部裡再會多官止緊議了來說 臣等
聞 命驚疑措躬戰慄切謂此禮初議咸以 獻皇
帝宜稱皇叔父興獻大王矣 臣等輒敢曰非禮也既

而尊稱 興獻帝矣臣等猶曰未成禮也既復加稱
皇帝本生皇考矣臣等猶曰未成禮也既復請去本
生二字別廟京師更詔天下矣於是凡有人心達禮
義者始相慶曰此禮之大成也夫禮也者理也天下
之中正也不及不可過亦不可也 皇上作之君作
之師建中以為民極者也假使 獻皇帝於禮當入
太廟臣等當先言之何待何淵今日之言也今者未
聞 皇上審處之言而但有再議之 命宸衷淵微
誠不可測豈臣等前日之言是今日之言非邪前日
之心忠今日之心不忠邪夫上下之情貴乎流通古
今之禮貴乎參酌情通而後議當議當而後禮制行

矣臣等愚昧徒知皇上孝心無窮猶未知皇上
審處者復何在也若曰請入獻皇帝主於太廟
者援古之禮經揆今之制度均為有礙臣等萬死不
敢以此誤皇上也切念典禮方成不可遽壞公論
方定不可復搖此臣等所以義不容默也記曰君者
立於無過之地也臣等豈敢悖理曲從誤皇上哉
故前日之所以惓惓者惟恐皇上大孝之心不明
於天下後世臣等之罪也今日之惓惓者亦惟恐
皇上大孝之心不明於天下後世臣等之罪也惟
聖明垂察焉

議樂舞疏

張亨敬

臣近因纂修大禮全書謹書 皇上安陸廟祀先嘗
命用十二邁豆樂用八佾以爲 天子之禮樂備矣
及觀大學士費宏奏議 世廟樂舞止宜用文舞以
爲 獻皇帝生長太平不以武功爲尚輒敢去舞樂
臣愚以爲茲議尚存遂非之心實非公共之禮也臣
嘗稽古王制曰自天子達於庶人喪從死者祭從生
者孔子曰父爲大夫子爲士葬以大夫祭以士父爲
士子爲大夫葬以士祭以大夫士大夫且然况天子
乎 皇上入繼大統尊爲天子追尊 獻皇帝爲天
子父廟用十二邁豆樂用八佾以天子之禮樂祀
獻皇帝所謂祭從生者禮也闕一非禮也樂記曰鍾

鼓管磬羽籥干戚樂之器也屈伸俯仰綴兆舒疾樂之文也簠簋俎豆制度文章禮之器也升降上下周旋裊襲禮之文也知禮樂之情者能作識禮樂之文者能述是難言也議者以漢高祖廟奏武德文始五行之舞至孝惠廟止奏文始五行之舞至孝文廟又奏昭德之舞謂高祖以武功定天下故兼奏武德惠文二帝不尚武功故止奏文始昭德臣愚以爲此不足證也按書景帝元年詔曰制禮樂各有所由歌者所以發德也舞者所以明功也高廟酎奏武德文始五行之舞孝惠廟酎奏文始五行之舞孝文皇治天下厚德侔天地利澤施四海靡不獲福明象乎日月

而廟樂不稱朕甚懼焉其為孝文皇帝廟為昭德之舞以明休德丞相申屠嘉等奏曰陛下永思孝道立昭德之舞以明孝文帝之盛德皆臣嘉等愚所不及因請群國諸侯宜各為孝文皇帝立太宗之廟制曰可乃致廟祀遍天下而卒毀焉茲議也所以為漢之君臣也夫漢自高帝以馬上得天下不事詩書嘗命叔孫通起朝儀召魯兩生不肯行謂禮樂積德百年而後可興文帝遺詔不欲天下為三年喪以日易月然本為吏民設景帝嗣君也乃冒用其文自短三年之制皆非達禮樂之本者豈可援以為 聖朝法乎臣嘗聞樂舞以侑數為降殺未聞以文武為偏全若

必以武功定天下者得兼用武舞三代之君揖讓得天下者宜莫如禹書大禹謨曰舞干羽於兩階干戚武舞也羽籥文舞也觀此可見古之天子皆用文舞武舞者也又叩詩曰簡兮簡兮方將萬舞魯記曰壬午猶繹萬八去籥宋儒朱熹云萬者舞之總名文用羽籥武用干戚觀此可見古列國諸侯皆用文舞武舞者夫樂舞之數天子八佾佾八人為六十四人諸侯六佾佾六人為三十六人降殺以兩大夫士亦如之國朝稽古定制太廟文舞六十四人各執羽籥武舞亦如文舞之數各執干戚總一百二十八人王國宗廟文舞三十六人各執羽籥武舞如文舞之

數各執干戚總七十二人夫 獻皇帝為王在興國
樂舞已應用文武七十二人今追尊 皇帝崇享
世廟乃止用文武六十四人而佾數反不逮王國宗
廟矣而可謂盡尊崇之禮乎况今 太廟之祭異世
同堂誠如所謂以武功定天下者兼武舞不尚武功
者止奏文舞則夫 太廟萬舞有奕昭格 列祖豈
真 高皇帝得兼用武舞而 列祖俱止宜用文舞
邪又孰從為之別邪此誠臆說非經典也夫 太廟
祖廟也 世廟禰廟也 皇上對越之主得備天子
禮樂以祭其 祖獨不得備天子禮樂以祭其禰邪
使八佾之舞用其文而去其武則兩階之容得其左

而闕其右是 皇上舉天子禮樂而自降殺之矣
天子父不得享天子禮樂矣其何以式四方垂世法
也夫名不正則言不順事不成禮樂不興今名正言
順是宜事成禮樂興矣曲禮曰在朝言禮問禮對以
禮伏承 皇上問及於臣臣不敢不以正對也今之
事君者孰不曰願 皇上為堯舜之主至議典禮乃
輒引秦漢以下不經故事為 聖朝法不亦異乎乞
再 勅禮官會臣重加詳議上請 聖裁必加脩數
更增武舞庶得著之大禮全書以貽令典不然則樂
舞未全典禮猶闕恐非所以昭 聖德光萬世矣

再議樂舞疏

張孚敬

臣聞禮有五經莫重於祭能備然後能祭此孝子之心也昔周公成文武之德追王大王王季上祀先公以天子之禮 皇上追尊 皇考獻皇帝別立 世廟祀以天子禮樂所謂祭從生者文武周公之道也有一弗備則廟祀不虔其何以盡 大聖人孝饗之心乎初議者於八佾之樂減去武舞止用文舞謬引漢景之詔為證夫既不知漢人所謂文始昭德者固未嘗無武舞又不知 國朝制度雖王國宗廟亦未嘗去武舞是皆先有懷二之心故卒無歸一之論也臣已援古證今反覆明辯其非矣誠恐 皇上勞於顧問憚於更張則九仞之功虧于一簣毫釐之差謬

於千里者也。或又方諸孔廟亦止用文舞八佾。夫孔廟之祭本古釋奠先師之禮。宋儒歐陽脩所謂學官四時之祭是也。唐開元始詔舞用六佾。猶諸侯之禮也。至國朝成化詔增六佾舞為八佾。加籩豆十二。遣翰林學士王獻諳闕里祭告。是固不敢純用天子之禮樂。亦彌文矣。今皇上乃以子祭。禘非祀先師也。皇上以天子有事。宗廟非遣官祭告也得比之。而同乎考之。春秋隱公五年九月考仲子之宮。初獻六羽。何休云。仲子之廟。唯有羽舞。無干舞者。婦人無武事。獨奏文樂也。胡安國云。不謂之佾。而曰羽者。佾者。干羽之總稱也。婦人無武事。而獨奏文樂。故

謂之羽而不曰佾也夫仲子乃魯惠公愛妾以為夫人不得入廟無祭享之所別為立宮以祀之非禮也仲子以別宮故不敢同群廟而降用六羽可也今

皇上為獻皇帝立世廟禮也雖別廟得同群廟者也又何降用文舞而同于仲子妾婦之禮乎夫斯禮也昔爭帝而復爭皇爭廟而復爭路廟成矣而復爭謁廟之禮焉禮成矣而復爭文舞武舞焉臣等非好爭也爭以禮也禮不備則不可筆之於書不可筆之於書則不可傳之于後誠大闕典非細故也是將使皇上大孝之心不能明于天下後世臣從建議之後亦將無所逃罪矣伏乞聖明垂鑒

履正祀典疏

倪岳

先該禮科給事中張九功題前事臣等謹詳古制天子祭天地祭宗廟祭社稷祭天下名山大川祭五祀凡載於祀典者皆有功德垂世如祭法者所謂法施於民以死勤事以勞定國能禦大菑能捍大患則祀之非此族類不在祀典故孔子曰非其鬼而祭之諂也又曰淫祀無福而先儒亦曰帝王無妄祭無徼福又曰明於天地之性不可惑以神恠知萬物之情不可罔以非類皆謂此也自秦以降乃多淫祠歷漢至元有因有革迨至國朝太祖高皇帝即位之三

年首詔天下改正祀典

列聖相承恪遵成憲間

有因所感應之事而增益祠祭或以萬壽千秋等
節而修建齋醮一時行之不察後遂襲以爲例因循
莫改增置益繁異端之徒轉相鼓扇恠誕相乘矯誣
殊甚夫非禮之祭非類之禱近代帝王固不能無然
絕地天之通嚴幽明之分在帝舜以爲當務之急蓋
非聖明之君卓然有見必不能深禁而痛絕之此給
事張九功之言所以深有望於今日者也伏乞
聖明敬事天地孝事宗廟嚴事山川百神舍此
之外凡有一應齋醮禱祠之類通行革罷不惟屏斥
異端之姦亦可節省無益之費既可允合乎聖祖
以禮事神之心而亦足致乎聖王至誠感神之妙

氣協應。國祚綿長。人心以明。風俗以正。其為治迫誠非小補也。今將查到在京各項祭祀除太倉之神。漢壽亭侯關羽。宋丞相文天祥。俱祀典。應祭外。其餘詳為辨析。窮加考究。以正萬年之祀。以解萬世之惑。云夫所謂釋迦牟尼文佛。三清三境天尊者。謹按傳記。西方有佛國。曰天竺。天竺有五中天竺。乃釋迦所生之地。後漢明帝時。其法始入中國。後之宗其教者。遂以釋迦為師。其曰三世佛者。則以釋迦之本性。為法身德業。為報身。并其真身而為三。其實本一人耳。今乃分為三像。而并列之。失其旨矣。唐儒韓愈。曰三代之時。天下太平。百姓安樂。壽考中國。未有也。

明帝時始有佛法其後亂亡相繼運祚不長宋齊梁陳以下事佛漸謹年代尤促惟梁武帝捨身施佛其後餓死臺城事佛求福乃更得禍由此觀之佛不足事亦可知矣至於道家以老子為師其所謂三清者蓋倣釋氏三身而為之尤為謬妄宋儒朱熹有曰玉清元始天尊既非老子之法身上清太上老君又非老子之報身設有二像又非與老子為一而老子又自為上清太上老君蓋倣釋氏之失而又失之者也况莊子明言老聃之死則聃亦人鬼耳豈可僭居昊天上帝之上哉由此觀之三清三境天尊實無所據况躬親祠醮傾心崇奉如宋徽宗者可謂至矣卒之

陷身虜廷覆亡宗社千載可為明戒但緣佛老異端之徒轉相模倣惑世誣民歷代因之莫之有廢是以遞年以來凡遇萬壽千秋等節奉欽依修建吉祥好事或遇喪禮七七修建薦揚好事俱先期一日遣官詣大興隆等寺祭告釋迦牟尼文佛朝天宮祭告三清三境天尊此皆因襲而行不合祀典所謂北極中天星主紫微大帝者謹按象緯書有曰北極五星在紫微垣中一名天極一名北辰其北第五星名天樞蓋極星之在紫微垣萬神所宗七曜三垣二十八宿衆星所拱為天文之正中又曰紫微大帝之座天子之常居也即今朝廷宮殿所在乃其象焉

國朝正統初年建紫微殿一所於大德觀之東設立
大帝之象每遇萬壽聖節正旦冬至俱遣大臣一
員祭告夫日月星辰並曜於天故古有大明祭日夜
明祭月幽宗祭星之文祖宗以來每歲南郊大祀
內壇已有星辰壇合祭之禮今乃像之如人稱之為
帝以極星之正祠於異端之官稽之祀典誠無所據
所謂九天應元雷聲普化天尊者謹按傳記有曰九
陰氣凝聚陽氣在內而不得出則奮擊而為雷霆非
如異端所謂龍車石斧鬼鼓火鞭恠誕之說也雷聲
普化天尊者道家以為玉霄一府總司五雷而雷部
諸神皆其所主而又託以六月二十四日為天尊示

現之日 朝廷歲以是日遣官詣大德顯靈宮致祭
夫風雲雷雨皆陰陽之妙用鬼神之盛德 祖宗以
來每歲南郊大祀外壇已有合祭之禮而八月望後
山川壇復有秋報之祭况自二月發聲之後無非雷
霆震奮之日顧乃止於六月二十四日於義何取至
於像設名稱禮亦無據所謂梓潼帝君者謹按圖誌
英顯王廟在劍州即梓潼神姓張諱亞子其先越雋
人因報母仇徙居劍州之七曲山仕晉戰沒人為立
廟唐玄宗西狩追封左丞僖宗入蜀封濟順王宋咸
平中改封英顯又按文昌六星在北斗魁前為天之
六府道家謂上帝命梓潼神掌文昌府事及人間祿

籍故元加號為輔元開化文昌司祿宏仁帝君而天下學校亦多立祠以祀之 京師舊有廟在北安門外景泰五年闢而新之 勅賜文昌宮額歲以二月初三日為帝君誕生之辰遣官致祭道家謂梓潼以孝德忠仁顯靈於蜀廟食其地於禮為宜祠之 京師不合祀典至於文昌之星與梓潼無干今乃合而為一誠出傳會所謂祖師三天扶教輔玄大法師真君者謹按傳記張道陵字輔漢光武十年生於吳之天目山善以符治病桓帝永壽元年於靈峯白日上升百二十歲唐天寶七年冊贈天師中和四年封三天扶教大法師宋熙寧中加封三天扶教輔玄大法

師大觀二年冊號正一靖應真君子孫歷代相傳皆有封號迨入國朝仍令傳襲正一嗣教真人之封秩正二品以正月十五日為祖師示現之辰遣官詣大德顯靈宮告祭又按宋邵伯溫聞見錄建安二十一年曹操破張魯定漢中魯祖陵順帝時客蜀學道鳴鶴山中造作符書惑百姓從其道者輒出五斗米時謂之米賊陵子衡衡子魯以法相授受自號師君其衆曰鬼卒曰祭酒大抵與黃巾相類朝廷不能討就拜魯漢寧太守鎮夷中觀此則陵本非異人而道家祖陵為天師者特因天寶詔稱漢天師而然耳今正月十五日乃其生辰自宜其子孫祭於其家可也所

謂大小青龍之神者謹按碑記昔有僧名盧自江南來寓西山之屍陀林秘魔巖一日二童子來拜於前盧納之鬻薪供奉雖寒暑無怠時久旱不雨二童子白於盧能限雨期言訖即委身龍潭須臾化二青龍一大一小至期果得甘雨事聞賜盧師號曰感應禪師建寺設像立碑以紀其事又別設祠於龍潭之上春秋遣官祭二青龍神 國朝宣德中勅建大圓通寺二青龍出現禱之有應於是加封號至今春秋二時遣順天府官致祭及遇歲旱遣官祭告蓋因舊傳二龍能致雲雨故累朝崇奉如此然雖稱二青龍其實蛇也蛇有神蛇其名曰螭亦能致雨今此二蛇西

山寺院處處有之畧無靈異近者京師連年水旱
祈禱無應則此亦非蜺蛇乃凡蛇耳蓋妖由人興久
自衰息無足崇奉明矣昔宋祥符中天慶觀有蛇極
怪異人以為龍孔道輔以手板擊其首死之其患遂
息程明道為上元主簿茅山池有小龍如蜥蜴崇奉
以為神物明道捕而脯之使人不惑後亦不聞如何
則此二蛇之怪誕正此類也所謂東嶽泰山之神者
謹按圖誌東嶽魯之泰山今在山東濟南府泰安州
山下有廟自黃帝以來封禪者七十二君唐宋元皆
加神以封號曰王曰帝若祀人鬼國朝洪武三年
詔去封號稱為東嶽泰山之神有司春秋致祭有事

則遣廷臣祭告今 京師朝陽門外亦有東嶽廟實
自元延祐中玄教大宗師張留孫買地為宮奉祀東
嶽天齊仁聖帝 國朝仍而不廢歲以三月二十八
日及 萬壽聖節遣官致祭夫嶽鎮海瀆以其山川
靈氣有發生潤澤之功故歷代祀之而泰山在魯封
內歲時已有常祭况每歲 南郊大祀壇八月山川
壇俱有合祭之禮前項祀典煩瀆無據所謂北極佑
聖真君者謹按傳記北極佑聖真君者蓋真武神也
真武本玄武宋真宗尚道教避聖祖諱改玄為真玄
龜也武蛇也此本北方玄武七宿虛危星形似之故
因而名後乃以玄武為真聖而作龜蛇於下靖康初

詔加號助順曰佑聖助順真武靈應真君及考圖誌
乃云真武為靖樂王太子也生而神靈長而勇猛志
除邪魔遇紫虛玄君授以道秘東遊遇天神授以寶
劍入武當山脩鍊功成白日飛昇奉上帝命往鎮北
方披髮跣足建皂纛玄旗統攝玄武之位此則道家
傳會之說殊為誕妄再考 國朝御製碑文 太祖
高皇帝平定天下兵戈所向神陰祐為多及定鼎金
陵乃於雞鳴山建廟以崇祀事載在祀典 太宗文
皇帝肅靖內難以神有顯相又於 京城艮隅并武
當山各重建廟宇而 兩京歲時春秋及 京師每
月朔望各遣官致祭武當山則命內外官員專一在

彼提督 列聖崇奉之意可謂至矣 憲宗純皇帝

在位常範金為像屢遣內官陳善齋往武當山安奉

蓋亦不過承先志以祈神休耳豈其陳善援引左道

之人鄧常恩等上則熒惑 聖聽糜費內帑下則騷

擾道路虐害生民且又奏請重修 京師廟宇改號

靈明顯佑宮日居其間引進邪術遂使香火之地幾

為姦盜之區固非 朝廷崇奉之本意使真武有神

亦豈其所樂聞哉所謂崇恩真君隆恩真君者謹按

道家之言有曰崇恩真君姓薩氏諱堅西蜀人在宋

徽宗時嘗從虛靖天師張繼先及王侍宸林靈素傳

學道法累有靈驗而隆恩真君則王樞火府天將王

靈官也又嘗從陸真君傳授符法 國朝永樂中有
杭州道士周思得以靈官之法顯於 京師附體降
神禱之有應乃於禁城之西建天將廟及祖師殿宣
德中改廟為大德觀封陸真人為崇恩真君王靈官
為隆恩真君又建一殿崇奉二真君左曰崇恩殿右
曰隆恩殿成化初年改觀曰宮加顯靈二字迤年四
季更換袍服三年一小焚化十年一大焚化又復易
以新製珠玉錦綺所費不貲每歲 萬壽聖節正旦
冬至及二真君示現之辰皆遣官致祭其崇奉可謂
至矣今就其言議之陸真人之法因王靈官而行王
靈官之法因周思得而顯而其法之所自皆宋徽宗

時林靈素輩之所傳一時傳會之說淺謬如此本無
可信況近年附體降神者乃欽發充軍顧珏顧倫之
父子其為鄙褻尤甚往往禱雨祈晴杳無應驗則其
怪誕可知所謂金闕上帝玉闕上帝者謹按大明一
統誌福州府閩縣南舊有洪恩靈濟宮一所祀二徐
真人即今之金闕玉闕二真人也真人五代時徐溫
子曰知證封江王知諤封饒王嘗提兵平福州福父
老戴之圖像以祀宋賜今額又考之御製碑文云
太宗文皇帝臨御之十有五年適遘疾弗豫百藥罔
效或有言神靈驗者禱之輒應脫然平復於是大新
閩地廟宇命有司春秋致祭歲易時衣給戶洒掃又

於京師立廟以祀之加封金闕真人王闕真人十六年又加封金闕真君王闕真君賜廟額曰洪恩靈濟宮正統初年重新宮宇進號金闕崇福真君王闕隆福真君成化二十二年重加尊號伯曰九天金闕總督魁神洪恩靈濟慈惠高明上帝仲曰九天王闕總督罡神洪恩靈濟仁惠弘靜上帝迺年以來每月朔望并萬壽聖節正旦冬至及二真君誕辰俱有祭祀遣官行禮及時食獻新至今不缺四時已有皮弁冠大紅紗羅紵絲織金錦雲龍朝服近又加以平天冠明黃紗羅紵絲衣服其黃服五年一次更換焚化紅服十年一次更換焚化夫神之世系年代可考

如此本非有甚異也先年止因有功於閩廟食一方
後以保護 太宗文皇帝聖躬故 京師有別廟之

奉但本處既有春秋二祭而 京師一年之間復有

前項祭祀不無煩瀆且惟皇上帝主宰於天而兄弟
並稱上帝其為僭擬可知所謂神父聖帝神母元君

金闕元君玉闕元君者謹按徐仙真錄及 國朝御

製碑文神父神母者即二徐真人之父母金闕玉闕

元君者蓋其配也宋理宗朝封父齊王為忠武真人

母白氏仁壽仙妃配許氏助順仁忠仙妃陶氏善助

慈懿仙妃 國朝永樂中加封父翊亮真人母淑善

仙妃許氏真應仙妃陶氏恭靜仙妃繼又進封其父

為真君成化二十二年神父加封高上神主慈悲聖
帝神母加封安寧護國恭靜元君金闕妃天房衛保
節靖元君王闕妃天房衆母顯祐元君每歲 萬壽
聖節正旦冬至俱遣官祭祀金闕玉闕元君又有誕
辰之祭皆因二真君一時禱應之功故推及而崇奉
之如此夫神父徐溫乃五代時誤國之臣專權弑主
殊無功德祀以報功豈宜濫及况父母并妃並受隆
名稱帝稱君僭擬益甚所謂城隍之神謹按易坎卦
有曰王公設險以守其國蓋謂君人者觀坎之象知
儉不可陵也故設為城郭溝池以守其國而保其民
人傳記謂其制自黃帝始歷代建國必有高城深隍

上以保障宗社朝廷下以衛捍百官萬姓其所繫甚
重其為功不小故國朝之制天下府州縣皆有城
隍之祭京都城隍廟舊在順天府西南累朝皆加
修葺歲以五月十一日為神之誕辰萬壽聖節各
遣官致祭夫廟祀城隍之神本非人鬼安得誕辰可
謂謬妄况每歲南郊大祀壇八月山川壇俱有合
祭之禮事體已重既與天下府州縣之祭不同今又
復為煩瀆之祭不亦謬乎前項祭告俱合罷免謹具
覆奏伏候聖裁

皇明疏鈔卷之四十六終